

KHOMIŠENE YA NTŠHWAFATSO YA MOLAO YA AFORIKABORWA: PAMPIRITLHAGISO 35: POROJEKE 144: PATLISISO MABAPI LE MOLAO O LE ESI WA LENYALO: DIPOTSO

A. Dipotso mabapi le molao o le esi kgotsa o o nang le dintlha tse di farologaneng wa lenyalo kgotsa wa kamano e e tseneletseng ntle le lenyalo

1.46 Mo dingwageng tse di fetileng tsa bo1990, Khomišene ya Ntšhwafatso ya Molao ya Aforikaborwa (SALRC) e ne ya akanya gore tumalano mo ntlheng ya kopanyo ya melao ya lenyalo e a tlhokega go ya ka dikarolo 30 le 31 tsa Molaotlhommo wa Ditshwanelo. Fa ditshwanelo tsa botlhokwa di ne di tlhoka melao e e kgaogantsweng ka nako eo, ke eng se batsibogi ba akanyang gore se fetogile gajaana?¹

1.47 A Aforikaborwa e tswelile ka melawana e e farologaneng mabapi le mefuta e e farologaneng ya manyalo?

1.48 Ke eng seo e tla nnang mesola le makoa a molao o le esi kgotsa o o kopantsweng o o tlhagisang lenane le le kopantsweng la ditlhokego tsa manyalo otlhe?

1.49 Ke eng seo e tla nnang mesola le makoa a molao wa dintlha tse di farologaneng o o nang le ditlhokego tsotlhe tsa manyalo otlhe?

1.50 Fa ka gongwe molao o o kopantsweng kgotsa o o nang le dintlha tse di farologaneng o amogelwa, a molao o tshwanetse go nna fela ka ga manyalo mme go nne le molao o o kwa thoko wa dikamano tsa kwa ntle ga lenyalo, kgotsa molao o tshwanetse go akaretsa ka bobedi manyalo le dikamano tsa kwa ntle ga lenyalo? Mesola le makoa a boikgethelo joo e tla nna efe?

1.51 Fa ka gongwe molao o o kopantsweng kgotsa wa dintlha tse di farologaneng o amogetswe, a o tshwanetse go tlhagisa fela ditlhokego tsa manyalo a a letlelelwang semmuso le/kgotsa dikamano tse di tseneletseng ntle le lenyalo, kgotsa a o tshwanetse go nna ka ga ditlamorago tsa semolao tsa dikamano tseo mabapi le paka ya nako ya tsona le fa di ya kwa bokhutlong? Mesola le makoa a boikgethelo bongwe le bongwe e tla nna efe?

B. Dipotso mabapi le tlhaloso ya lenyalo

2.3 Molao o o tshitsintsweng o tshwanetse go tlhalosa lenyalo jang?

2.4 Molao wa Kamogelo ya Manyalo a Setso o letla manyalo a lefufa le Molao o o thadilweng wa Manyalo a Bamoselemo o laela jalo mabapi le manyalo a lefufa. A molao o o solofetsweng o dire ditaello mabapi le manyalo a lefufa, mme fa go le jalo, jang?

2.5 Ke eng se tota kamano e e tseneletseng ntle le lenyalo e leng sona se se ka dirang gore bakapelo ba siamele go ka arogana mo ditshireletsong tsa semolao go ya ka molao wa dintlha tse di farologaneng?

C. Dipotso mabapi le tetla le bokgoni jwa go nyala

¹ Dinomoro tsa ditemana di supa dinomoro tsa ditemana tse di tsamaelanang mo Pampiritlhagisong 35.

2.17 A teko ya molao wa tlwaelo le tlhokego ya molao o o diriswang go tlhomamisa bokgoni jwa go nyala o o tlhokang gore matlhakore ka bobedi a nne teng fa go konosetswa lenyalo e lekane kgotsa a go tlhokega gore molao wa Aforikaborwa o ntšhwafatswe?

2.18 A batsibogi ba akanya gore go letlwe moemedi go emela motsayakarolo mo lenyalong?

2.19 A go na le tshegetso ya dikgato tsa peomolao tse ka nepagalo di tsayang tsia boikemelo le tetla ya kitso go tsaya ditshwetso ka lenyalo?

2.20 A molao o o solofetsweng o tlhoka ka tsepamo gore baamegi ba tshwanetse go nna le bokgoni jwa monagano go tsena mo lenyalong jaaka fa Molao wa Lenyalo wa Australia o dira mabapi le seno?

2.21 A tetla ya mosadi wa ntlha e a tlhokega fa monna a batla go konosetsa lenyalo la bobedi?

D. Dipotso mabapi le palotlase ya dingwaga tsa lenyalo

2.28 A bannaleseabe ba dumela gore diphosonyana magareng ga Molao wa Lenyalo, Molao wa Kamogelo ya Manyalo a Setso le Kopano ya Semmuso mabapi le palotlase ya dingwaga tsa lenyalo di tshwanetse go baakanngwa?

2.29 A batsibogi ba dumela gore Aforikaborwa e tshwanetse go obamela didiriswa tsa boditšhabatšhaba le tsa kgaolo go baya palotlase e e tshwanang ya dingwaga tsa lenyalo go dingwaga di le 18 ntle le kgethololo epe ya tetla ya letlhakore la boraro ka batsadi, dikgotlatshekelo, kgotsa motlhankedi ofe go thibela bana go nyalwa kgotsa go tsena mo dikamanong tse di tseneletseng ntle le lenyalo?

E. Dipotso mabapi le go dira kitsiso kgotsa ditlhokego tsa laesense ya lenyalo

2.32 A batsibogi ba dumalana le go itsisiwe gape ga go dira kitsiso le thebolo ya dilaesense tsa lenyalo mo Aforikaborwa?

2.33 A batsibogi ba akanya gore go dira kitsiso kgotsa thebolo ya laesense ya lenyalo go tla nna le seabe mo go tlhokomeleng kgatlhego ya puso mo go konosetsweng ga manyalo?

2.34 Fa karabo e dumalana le seno, ke tshedimosetso efe e e tshwanetseng go tsennngwa mo kitsisong?

F. Dipotso mabapi le seabe sa batlhankedi ba manyalo

2.41 Re etse tlhoko gore Molao wa Manyalo le melawana e mengwe di kaela go batlhankedi le badiragatsi ba ba amegang mo tlhomamisong ya lenyalo le mo kwadisong efe kgotsa mefuta yotlhe ya manyalo? Fa go se jalo, a batsibogi ba tshitsinya ditsela dingwe?

2.42 Fa e le gore batsibogi ba tshegetsa botsayakarolo jwa batlhankedi ba manyalo, ditlhokego tsa botsayakarolo jwa bona ke dife?

2.43 Fa e le gore batlhankedi ba manyalo ba tshwanetse go tswelela go tsaya karolo mo

tlhomamisong ya manyalo, ditiro tsa bona e tla nna dife: go rekota manyalo, go thusa ka kwadiso ya lenyalo kgotsa dilo dingwe le dingwe go tlamela ka bopaki jwa lenyalo mabapi le maitlhomho a semmuso?

G. Dipotso mabapi le kwadiso ya lenyalo

2.63 Re etse tlhoko fa godimo gore DHA e tshegetsa kwadiso ya manyalo otlhe. A batsibogi ba tshegetsa go kwadiswa ga manyalo?

2.64 A go retelwa ke go kwadisa go tshwanetse go ama boleng jwa lenyalo?

2.65 Fa lenyalo le santse le ka amogelesega ntle le kwadiso, a go tshwanetse go nna le ditsela dingwe tsa go supa go nna teng ga lenyalo? Ditsela tseo e tla nna dife?

2.66 A go tlhokega gore matlhakore ka bobedi a kwadise lenyalo kgotsa go tlhokega letlhakore le le esi gore le kwadise? Fa letlhakore le le esi le ka kgona go kwadisa lenyalo, ke tshedimosetso efe le dikgato dife tse di tla tlhokegang go thibela kwadiso ya manyalo a maaka?

2.67 A matlhakore a tla kgona go kwadisa manyalo nako nngwe le nngwe morago ga go konosetswa ga ona? Ke melemo efe le makoa afe a a tla nnang teng fa go ka letlwa gore kwadiso e diragale nako nngwe le nngwe pele ga go konosetswa ga lenyalo?

2.68 A dikamano tse di tseneletseng ntle le lenyalo di kwadiswe go letla bakapelo go nna le ditshwanelo tsa semolao kgotsa a kwadiso e tsewe fela jaaka sesupo sa go nna teng ga dikamano tseo? Kgotsa a kwadiso ga e tlhokege gotlhelele mabapi le dikamano tse di tseneletseng ntle le lenyalo?

2.69 Fa dikamano tse di tseneletseng ntle le lenyalo di ka kwadiswa, ke tshedimosetso efe e e tlhokegang e bile ke dikgato dife tse di tla siamelang kwadiso?

2.70 Fa kwadiso ya dikamano tse di tseneletseng ntle lenyalo e ka tsewa fela jaaka bosupi jwa go nna teng ga kamano, ke ditsela dife tse dingwe tse di ka nnang teng go supa go nna teng ga dikamano tseo e bile ke bopaki bofe jo bo ka amogelwang jaaka bosupi jwa dikamano tseo?

2.71 A go dintlha dingwe gape tse di mabapi le kwadiso tse batsibogi ba eletsang go di tlhagisa tse di tlhokang go elwa tlhoko?

H. Dipotso mabapi le meletlo ya manyalo le dikaelo tse di neetsweng kgotsa tse di rebotsweng tsa manyalo

2.77 Mo kopong ya DHA mabapi le patlisiso eno go tlhagisitswe gore puso ga e a tshwanela go nna le kgatlhego epe mo tsamaisong ya sedumedi kgotsa ya setso ya meletlo ya manyalo. Molao wa Manyalo le Molao wa Kopano ya Semmuso o neelana ka dikaelo tse di tshwanetseng go diriswa ka nako ya meletlo ya manyalo e e rileng. A batsibogi ba dumalana le seno mme fa go se jalo goreng?

2.78 A batsibogi ba etse tlhoko gore kaelo e e laetsweng ya lenyalo e etleetsa ka mokgwa mongwe le mongwe mo go tsenngweng mo tirisong ga netefatso ya semolao ya gore lenyalo le diragaditswe, fa go le jalo, jang?

I. Dipotso mabapi le ditlamorago tsa manyalo

2.86 Fa go na le tshegetso ya molao o le esi wa manyalo kgotsa molao o o nang le dintlha tse di farologaneng, o tshwanetse go laola eng mabapi le thoto ya lenyalo e bile o tla ama jang molao o o leng teng?

2.87 Megopolo ya batsibogi ke efe mabapi le ditlamorago tsa manyalo otlhe le dikamano tse di tseneletseng ntle le lenyalo fa di laolwa ka molao o le esi wa manyalo kgotsa molao o o nang le dintlha tse di farologaneng?

2.88 Batsibogi ba lopiwa go tlhagisa gape gore a go na le merero e mengwe mabapi le thoto ya lenyalo e e tshwanetseng go tsewa tsia ke SALRC.

J. Dipotso mabapi le tlameo ya monyalanimmogo

2.100 Go dirilwe boikuelo mo malobeng jwa gore tlameo ya monyalanimmogo e amogelwe mo mabakeng a fa go senang lenyalo le le amogelesegang le tlamego ya semolao e gajaana e amogelwang e e pateletsang tlamego ya semolao ya go tlamea ka madi. A molao o amogele tlamego ya semolao ya tlameo magareng ga bakapelo ba ba sa nyalanang?

2.101 A tlamego ya semolao ya tlameo e atolosetswe mo mabakeng a mo go ona a le mongwe wa bakapelo ba ba sa nyalanang a leng mo kamanong ntle le lenyalo kgotsa a leng monyalanimmogo mo lenyalong? SALRC e tla netefatsa gore ditshwaelo tse di dirilweng ke batsibogi di tsewa tsia mo patlisisong e e maleba, e ka tswa e le thadiso ya tlameo kgotsa molao wa thoto ya lenyalo.

K. Potso mabapi le ditumalano tsa banyalani pele ga lenyalo le katlholo ya kgotlatshekelo mo go direng ditaelo tse di ka fa molaong

2.107 A molao o le esi wa lenyalo o laele mabapi le bokhutlo, kwadiso le kgatelelo ya ditumalano tsa banyalani pele ga lenyalo?

L. Dipotso mabapi le phediso ya dikamano ka tirisogape ya kgotlatshekelo le tharabololo e nngwe ya thulano mo mererong ya lelapa

2.114 Ka ntlha ya fa SALRC e dira dipatlisiso tse di totobetseng tsa tharabololo ya dithulano mabapi le dithulano tsa lelapa, go tlhamaletse gore SALRC ga e a tshwanela go dira matsapa a yona gabedi mme e tshwanetse go dirisa ditlameo ka matsetseleko. Fa e le gore batsibogi ba na le ditshwaelo tsa ka moo ditsela tse dingwe tsa tharabololo ya dithulano di ka diriswang go rarabolola dithulano tsa semolao tsa lelapa, ba lopiwa go romela ditshwaelo tsa bona go SALRC gore di tsewe tsia jaaka karolo ya dipatlisiso tse dingwe tse di setseng di dirwa ke SALRC. Ditshwaelo di tla tsewa tsia mo dipatlisisong tseo gore go tseelwe ditshwaelo tsa batsibogi kwa pele..

M. Potso mabapi le manyalo a maaka kgotsa ao e seng a nnete

2.120 Batsibogi ba lopiwa go dira ditshitsinyo mabapi le ka moo manyalo a maaka a ka thibelwang ka teng le ka moo go ka samaganwang le ona ka teng fa a setse a diragetse?